

Xedapen Orokorrak

Kultura Saila

132/2000 DEKRETUA, uztailaren 11koa, Euskararen Aholku Batzordearen antolamendu eta funtzionamenduaren araudia aldatzeko eta bateratzeko dena.

10/1982 Legeak, Euskeraren Erabilpena Arauzkotzezkoak, 29. artikuluan, euskararen erabileraren normalkuntza-lanean laguntzeko harreman-organoa eratzea aurreikusten du, esandako legea ezarri eta gauzatzeari begira erakundeen ahaleginak aztertu, bideratu eta koordinatzeko, hain zuzen.

Euskararen Aholku Batzordea eraldatzeko ekainaren 18ko 156/1996 Dekretuaren bitartez, aipatutako helbururako sortutako Euskararen Aholku Batzordearen araubidea aztertu eta egituratu zen.

Dekretu horrek hainbat moldaketa izan ditu Euskararen Aholku Batzordearen funtzionamendu-arauak euskararen erabileraren normalkuntzak denboran zehar ekarri dituen beharrei egokitzeko.

Moldaketak, hain zuzen ere, lau izan dira: uztailaren 16ko 183/1996 Dekretu bidezkoa, uztailaren 30eko 208/1996 Dekretu bidezkoa, abenduaren 10eko 288/1996 Dekretu bidezkoa eta urriaren 5eko 343/1999 Dekretuaren bitartez eginikoa. Orain, berriro ere, beste aldaketa batzuk egiteko beharra sortu da. Egin beharreko moldaketen artean aipagarriena da organo horri berariaz aitortzen zaiola Eusko Jaurlaritzak 1998ko uztailaren 28an onarturiko Euskara Biziberritzeko Plan Nagusiaren garapenari buruzko jarraipen-lanak egiteko ardura. Gainerako aldaketak, berriz, Aholku Batzordearen funtzionamendua hobetzeari begirako eguneratze eta doitze teknikoaren aldetiko moldaketak dira.

Horiek horrela, moldaketa horiek beste dekretu baten bitartez onartzeak lehen aipaturiko dekretuaren bosgarren aldaketa egitea ekarriko luke, eta, jakina, horrek kide anitzeko organo horren antolamenduaren eta funtzionamenduaren esparru orokorra osatzen duen araubidearen sakabanatze handiagoa sortuko luke oraindik.

Hortaz, komenigarritzat jo dugu dekretu honen bitartez araubide horretan oraingo moldaketak txertatzea eta orain artean dekretu bidez onarturiko xedapen guztiak baterabiltzea.

Ondorioz, Kultura sailburuaren proposamenez, Jaurlaritzaren Kontseiluak 2000ko uztailaren 11an egindako bilkuran aztertu eta onartu ondoren, hauxe

XEDATU DUT:

Lehenengo artikulua.– Euskararen Aholku Batzordea azaroaren 24ko 10/1982 Legearen 29. artikuluan aurreikusitako harreman-organoa izango da, hizkuntza-normalkuntzan diharduten erakunde publiko nahiz pribatuen ahaleginak eta ekintzak aztertzeko, bideratzeko eta koordinatzeko.

Euskararen Aholku Batzordea Kultura Sailari atxikita dago, Hizkuntza Politikarako Sailburuordetzaren bitartez.

Bigarren artikulua.– Honako hauek dira Euskararen Aholku Batzordeak jarduteko izango dituen kide anitzeko organoak:

- Batzorde Osoa
- Batzorde-atal Iraunkorra
- Batzorde-atal bereziak

Hirugarren artikulua.– 1.– Hona Euskararen Aholku Batzordearen Batzorde Osoaren osakera:

- 1.a.– Lehendakaria: Eusko Jaurlaritzako lehendakaria.
- 2.a.– Lehendakariordea: Kultura sailburua.
- 3.a.– Hizkuntza Politikarako sailburuordea.
- 4.a.– HABEko zuzendari nagusia.
- 5.a.– Euskal Irrati Telebista erakundeko zuzendari nagusia edo ordezkari izendatzen duena, erakunde horretako nahiz atxikita duen sozietate publikoren bateko zuzendari izaera izan beharko duela.
- 6.a.– Ogasun eta Herri Administrazio sailburuak izendatutako ordezkaria.
- 7.a.– Hezkuntza, Unibertsitate eta Ikerketa sailburuak izendatutako ordezkaria.
- 8.a.– Ondorengo erakundeek eta organismoek proposatuta izendatuko diren bokalak:
 - a) hiru foru aldundietako ordezkari bana, gutxienez zuzendari mailakoak;
 - b) Euskal Udalen Elkarteko (EUDEL) ordezkaria;
 - c) Udaleri Euskaldunen Mankomunitateko (UEMA) ordezkaria;
 - d) Euskaltzaindiko ordezkaria.

9.a.– Gehienez ere berrogei bokal. Hizkuntza-normalkuntzaren prozesuan eraginik duten arloetako pertsona ezagunen artean aukeratuko dira bokal horiek. Kultura sailburuak proposatuko ditu bokalen kopurua eta zerrenda, eta euskararen hizkuntza-komunitatearen lurraldeetako ordezkariak izateari begiratuko zaio.

10.a.– Idazkaria, Hizkuntza Politikarako sailburuordeak izendatua. Idazkariak Hizkuntza Politikarako Sailburuordetzako zerbitzu teknikoen laguntza izango du.

2.– Batzorde Osoaren bileretara, eztabaidatzekoak diren gaietako adituak eraman ahal izango dira. Aditu horiek hitza izango dute baina ez botorik.

Laugarren artikulua.– 1.– 3.1 artikuluko 6, 7, 8 eta 9. idatz-zatietan aipatutako bokalak Kultura sailburuak izendatuko ditu Agindu bidez.

2.– Euskararen Aholku Batzordearen Batzorde Osoko berezko bokal ez direnen kargualdia bi urtekoa izango da, eta kargualdi hori berriztatzerik izango da.

3.– 3.1 artikuluko 6, 7 eta 8. idatz-zatietan adierazitako Aholku Batzordearen Batzorde Osoko bokalen artean hutsik izanez gero, horren berri emango zaio proposamena edo aukera egin duen erakunde edo organoari, geratzen den kargualdirako beste bokal bat proposatu edo aukera dezan hilabeteko epean.

Bosgarren artikulua.– 1.– Aholku Batzordearen Batzorde Osoko lehendakariari dagokio Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 23.1 artikuluan kide anitzeko organoetako lehendakariari aitortutako egitekoak betetzea. Erabakiak hartzerakoan berdinketarik gertatuz gero, lehendakariaren botoak ebazte-indarra izango du.

2.– Aholku Batzordearen Batzorde Osoko lehendakari kargua hutsik egonez gero, edo bera kanpoan nahiz gaixorik izanez gero, edo bestelako legezko arrazoirik gertatzen bada, Kultura sailburuak, Hizkuntza Politikarako sailburuordeak edo honek Euskararen Aholku Batzordeko kideen artean izenda dezanak ordezkatzeko dute, hurrenkera horretan hain zuzen.

Seigarren artikulua.– 1.– Aholku Batzordearen Batzorde Osoko idazkariak hitza eta botoa izango ditu Aholku Batzordearen Batzorde Osoaren bileretan, eta Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 25.3 artikuluan kide anitzeko organoetako idazkariari aitortutako egitekoen gain, Euskararen Aholku Batzordearen batzorde-atal berezien koordinazio-lanak egingo ditu.

2.– Aholku Batzordearen Batzorde Osoko idazkari kargua hutsik geratzen bada, edo bera kanpoan nahiz gaixorik izanez gero, edo bestelako legezko arrazoirik gertatzen bada, lehendakariak izendatuko duen bokalak ordezkatzeko du.

Zazpigarren artikulua.– Hona Aholku Batzordearen Batzorde Osoaren egitekoak:

a) Jaurlaritzak eskatuta, Euskal Autonomia Erkidegoko hizkuntza-normalkuntzari buruzko gaiak aztertzea eta ikertzea.

b) Euskararen erabilerari buruzko xedapenak ondo ezartzeko behar diren neurriak proposatzea Jaurlaritzari eta dagokien erakundeei.

c) Hizkuntzari loturiko gaietan eskumenik duten herri-aginteen jarduera koordinatua bermatzeko neurriak proposatzea.

d) Hizkuntza Politikarako Sailburuordetzak egingo duen Euskara Biziberritzeko Plan Nagusiaren zirriborroari buruzko txostena egitea, Eusko Jaurlaritzaren Kontseiluari aurkeztu baino lehen, eta, ondoren, Euskara Biziberritzeko Plan Nagusiaren garapenari eta betetze-mailari buruzko txostena egitea, Eusko Jaurlaritzaren Kontseiluari aurkeztu baino lehen.

e) Batzorde-atal Iraunkorrak egingo duen ekintzen urteko oroitza onartzea.

f) Euskararen Aholku Batzordearen Batzorde Osoak ekintzen urteko oroitza txertatuko du Euskara Biziberritzeko Plan Nagusiaren garapenari buruzko ebaluazioa.

g) Legeek edo erregelamenduek aitortutako beste edozein egiteko.

Zortzigarren artikulua.– Batzorde-atal Iraunkorreko kide izango dira:

a) Lehendakaria.

b) Kultura sailburua.

c) Hizkuntza Politikarako sailburuordea.

d) Hezkuntza, Unibertsitate eta Ikerketa Saileko ordezkaria.

e) Euskararen Aholku Batzordearen Idazkaria.

f) Batzorde-atal berezietako lehendakariak, Batzorde Osoko kide ere izango direla.

g) Batzorde Osoak 3.9 artikuluan aurreikusitako kideen artean izendaturiko beste bost kide, euskararen hizkuntza-komunitatearen lurraldeetan euskarak duen egoera eta erabilera ezagutu eta harremana dutelako izendatuak hain zuzen.

Bederatzigarren artikulua.– Hona Batzorde-atal Iraunkorraren egitekoak:

a) Euskararen Aholku Batzordearen gaien ohiko tramitazioa, Batzorde Osoaren bilerarik ez denean.

b) Aholku Batzordearen ekintzen urteko oroitza egitea, Batzorde Osoak onar dezan.

c) Legeek, erregelamenduek edo Aholku Batzordearen Batzorde Osoak agindutako beste edozein gai.

Hamargarren artikulua.– 1.– Aholku Batzordearen Batzorde Osoak gutxienez urtean bitan egingo du ohiko bilera. Bilduko da, halaber, lehendakariak dei egindakoan.

2.– Batzorde-atal Iraunkorra hiru hilabetez behin bilduko da gutxienez.

Hamaikagarren artikulua.– 1.– Gai zehatzei buruzko lanak eta txostenak egiteko, batzorde-atal bereziak eratu ahal izango dira, Aholku Batzordearen Batzorde Osoak erabakiz gero.

Batzorde-atal bereziak iraunkorrak izan daitezke, eta eratzeko ebazpenean jasotakoarekin bat etorritik jardungo dute.

2.– Batzorde-atal berezi horien egitekoak izango dira: Batzorde Osoari eta Batzorde-atal Iraunkorrari beren egitekoak betetzen laguntzea eta Euskararen Aholku Batzordeak eska ditzan oinarritzko azterketak egitea.

3.– Batzorde-atal berezien jarduketa Aholku Batzordearen Batzorde Osoaren orientazio eta jarraibideei lotuko zaie, eta jarduketa horri buruz eska diezazkien argibide guztiak emango dizkiote Batzorde Osoari.

4.– Batzorde-atal berezien osakera bakoitzaren eratze-ebazpenaren arabera izango da. Kideak, bestalde, Aholku Batzordeari aitorturiko egitekoekin zerikusirik duten lagunak izango dira, harreman-organo horretako kideak izan edo ez.

5.– Hizkuntza Politikarako sailburuordea eta Euskararen Aholku Batzordearen idazkaria batzorde-atal berezi guztietako kide izango dira.

Hamabigarren artikulua.– Euskararen Aholku Batzordearen batzorde-atal bereziek Hizkuntza Politikarako Sailburuordetzako zerbitzu teknikoaren laguntza izango dute.

Hamahirugarren artikulua.– Euskararen Aholku Batzordearen barruan Toponimiako Batzorde-atal Berezia dago, kontuan hartzekoa baita, batetik, toponimia normalizatzeko lanaren izaera eta berezitasuna eta, bestetik, toponimoak ofizial egiteko administrazio askok parte hartzen dutela. Batzorde-atal hori iraunkorra da eta Euskal Autonomia Erkidegoko toponimoak finkatu, aldatu eta berreskuratzeko aholkuak eta proposamenak egingo ditu. Bestalde, hurrengo artikuluetan ezarritako araubide bereziaren arabera jardungo du.

Hamalagarren artikulua.– 1.– Hona Toponimiako Batzorde-atal Bereziaren osakera:

a) Lehendakaria: Hizkuntza Politikarako sailburuordea.

b) Idazkaria: Euskararen Aholku Batzordearen Batzorde Osoko idazkaria.

c) Bokalak:

– Hirigintza, Etxebizitza eta Ingurugiro Saileko ordezkaria, kartografia arloan eskumena duen antolaketa atalekoa hain zuzen.

– Ogasun eta Herri Administrazio Saileko ordezkaria, toki araubidearen arloan eskumena duen antolaketa atalekoa.

– Euskal Autonomia Erkidegoko lurralde historikoetako foru-aldundietako ordezkari bana.

– Euskal Udalen Elkarteko (EUDEL) ordezkaria, elkarte horrek izendatua.

– Institutu Geografiko Nazionaleko ordezkaria.

– Euskaltzaindiko kidea, erakunde horrek izendatua.

– Gehienez ere beste sei bokal. Bokal horiek Hizkuntza Politikarako sailburuordeak izendatuko ditu toponimiako eta euskarako aditu ezagunen artean.

2.– Toponimiako Batzorde-atal Bereziko bokalak Hizkuntza Politikarako sailburuordearen ebazpen bidez izendatuko dira eta Euskararen Aholku Batzordearen Batzorde Osoko bokalekin batera utziko dute kargua azken hauen kargualdia bukatzean.

Toponimiako Batzorde-atal Bereziko bokalek kargualdi bat baino gehiago izan dezakete.

Hamabosgarren artikulua.– Toponimiako Batzorde-atal Bereziko bokalen artean, beste erakunde edo organo batek proposatutako edo aukeratutakoen artean hain zuzen, hutsik gertatuz gero, Hizkuntza Politikarako sailburuordeak horren berri emango dio bokala proposatu edo aukeratu zuen erakundeari edo organoari. Erakunde edo organo horrek hilabete izango du geratzen den kargualdirako beste bokal bat proposatzeko edo aukeratzeko.

Hamaseigarren artikulua.– Toponimiako Batzorde-atal Bereziak honako egiteko hauek izango ditu:

a) Euskal Autonomia Erkidegoko Administrazioari aholkuak ematea Euskal Autonomia Erkidegoko toponimoak bildu, berreskuratu, zerrendatu eta gordetzeko beharrei eta lehentasunei buruz.

b) Kasu bakoitzean eskumena duen administrazioak eskatzen duen guztietan, izen ofizialen normalizazioari buruzko aholkuak ematea.

c) Mapetan, liburuetan, errotuluetan eta komunikabideetan, orokorrean, toponimoak erabiltzeko eta idazteko irizpideak eta arauak proposatzea.

d) Toponimia arautzeko Eusko Jaurlaritzak egin ditzan xedapen orokorrei buruzko txostena egitea, eta Euskal Autonomia Erkidegoko herri-administrazioek, bakoitzak bere eskumenen esparruan, toponimoen izen ofizialak aldatzeko edo egokitze eska ditzaten irizpenak ematea.

e) Batzorde-atalaren ekintzen urteko oroitza egitea eta Euskararen Aholku Batzordearen Batzorde-atal Iraunkorrari aurkeztea, Euskararen Aholku Batzordearen urteko oroitza sartzeko.

f) Euskararen Aholku Batzordearen Batzorde Osoak toponimiaren arloan eska diezazkion oinarritzko azterketak egitea.

Hamazazpigarren artikulua.– Euskararen Aholku Batzordeko eta bere batzorde-atal berezietako kideek jardunagatik izandako gastuen ondoriozko kalte-ordainak eta dietak jasotzeko eskubidea izango dute. Ordainketa horiek Euskal Autonomia Erkidegoko Administrazio Orokorrak horretarako ezarritako dituen prozedurak erabiliz egingo dira. Ordainketa horiei legez ezarritako kopuruak kenduko zaizkie.

XEDAPEN GEHIGARRIAK

Lehena.– Euskararen Aholku Batzordeak kontuan izan beharko ditu bere egitekoak gauzatzerakoan, antzeko organismoen, eta, bereziki, euskararen lurraldeetako organismoen, jarduketak. Aholku Batzordeak organismo horiekiko harremanak eta lankidetzak sustatuko ditu, euskararen hizkuntza-komunitateen batasun soziolinguistikoari eusteko eta bizitasun linguistikoa bultzatzeko.

Bigarrena.– Euskararen Aholku Batzordeak dekretu honetan ezarritako jarduerak osatzerik izango du. Ezarritako ditu, halaber, batzorde berezi guztien jarduerak arauak.

Hirugarrena.– 3.1 artikuluko 5, 6, 7 eta 8. puntuetan adierazitako Batzorde Osoko kideek ordezkoak izendatu ahal izango dituzte, ezargarri dituzten arauen arabera eta, beti ere, Euskararen Aholku Batzordeak dituen edo ezar ditzakeen erreserbak eta mugak errespetatuta.

XEDAPEN INDARGABETZAILEA

Indarrik gabe geratzen dira ekainaren 18ko 156/1996 Dekretua eta horren aldaketa diren uztailaren 16ko 183/1996 Dekretua, uztailaren 30eko 208/1996 Dekretua, abenduaren 10eko 288/1996 Dekretua eta urriaren 5eko 343/1999 Dekretua, bai eta maila bereko edo txikiagoko xedapenak ere dekretu honetan ezarritakoaren aurkakorik diotenetan.

AZKEN XEDAPENAK

Lehena.– Dekretu honetan ezarri ez direnetan eta Euskararen Aholku Batzordeak onar ditzan jarduerak arauetan, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legean kide anitzeko organoetara buruz zehaztutakoa izango da ezargarri.

Bigarrena.– Kultura sailburuari eskumena ematen zaio dekretu hau garatu eta betearazteko behar diren xedapen guztiak emateko.

Hirugarrena.– Dekretu hau Euskal Herriko Agintaritzaren Aldizkarian argitaratu eta biharamunean jarriko da indarrean.

Vitoria-Gasteizen, 2000ko uztailaren 11an.

Lehendakaria,

JUAN JOSÉ IBARRETXE MARKUARTU.

Kultura sailburua,

M.^a CARMEN GARMENDIA LASA.

Gaiak:

ALDAKETA; ORGANIZAZIOA; EUSKARAREN AHOLKU BATZORDEA

Aurreko Erreferentziak

1996/07/01ean argitaratutako 1996/06/18ko 199600156 DEKRETUA ndargabetzen du

1996/08/02an argitaratutako 1996/07/16ko 199600183 DEKRETUA indargabetzen du

1996/08/13an argitaratutako 1996/07/30reko 199600208 DEKRETUA ndargabetzen du

1996/12/27an argitaratutako 1996/12/10reko 199600288 DEKRETUA ndargabetzen du

1999/10/07an argitaratutako 1999/10/05eko 199900343 DEKRETUA indargabetzen du

Geroko Erreferentziak

2000/07/26an argitaratutako 2000/07/11ko 200000132 DEKRETUAK zuzendutakoa
2002/08/07an argitaratutako 2002/07/16ko 200200179 DEKRETUAK aldatutakoa

Lege-Informazio

© 2004 · Eusko Jaurlaritzza – Gobierno Vasco